

Emocionante despedida di Gobernador Fredis Refunjol

Prome Minister Mike Eman “Sr. Refunjol a uni pueblo na momentonan dificil”

ORANJESTAD- Siman pasa gobierno di Aruba, Parlamento, representantenan di Reino Hulandes y demas invitadonan a tuma despedida oficial di Gobernador Refunjol den presencia di su famia. Prome Minister Eman a bisa cu e momento a yega pa expresa gratitud y desea e gobernador saliente un bon pensioen den compania di su famia den su siguiente etapa di bida.

Eman: “Nos a bini hunto awe pa reconoce un persona dedica na su trabou, na su isla y Reino. Den e funcion di gobernador no semper ta facil pa haci distincion entre Aruba y Reino, pasobra tur dos ta yega na otro. Interes di nos isla ta tambe interes di Reino y vice versa. Tin cierto momento cu e dos interesnan aki por interferi cu otro. Anto e ora no tin un otro funcionario dentro di nos sistema Constitucional cu tin mas que ver cu esaki cu no ta e gobernador. No e Minister di Asuntonan Interno di Hulanda y di Relacionnan di Reino ni tampoco e Prome Minister di Aruba. Minister di Relacionnan di Reino tin un relacion estrecho cu Hulanda y Prome Minister ta masha involvi cu e interesnan di su isla. Memey di esaki tin e funcion di gobernador. Esaki tin bes ta masha dificil y inconfortabel. E ta algo cu nos a experencia tambe, durante e ultimo añanan y hasta porta e ultimo decencia y sigur den e ultimo periodo di Gobernador Refunjol.”

Eman a bisa cu ta poco ta esnan cu por a ‘sobrevivi’ un momento asina dificil, sigur dentro di e contexto politico di nos isla y dentro di un comunidad polarisa manera e actual gobernador. “Ta danki na e personalidad di Sr. Refunjol, na su envolvimento cu su isla, na su amor prohimo, su contactonan cu hopi den pueblo, cu e momentonan dificil aki a



keda solucionaria.” Dirigiendo su mes na Gobernador Refunjol Prome Minister Eman a bisa “Ta completamente danki na bo caracter, na e ser amabel cu bo ta cu por brasa un otro den temponan dificil cu cosnan no a escala. Mi mes a experencia esaki riba e di shete dia di mi protesta profundo ora cu sr. Re-

funjol a invita mi den su oficina pa puntra mi si lo no ta un bon idea pa para mi accion. E combersacion ey a termina cu un abraso Arubiano fuerte cu awa den nos wowonan, pasobra e amor pa nos isla por surpasa tur cos.” Eman a finalisa a parti aki bisando ‘Danki, mi amigo’.

Prome Minister a yama danki na famia Refunjol pa a presta Aruba un persona cu tanto dedicacion pa sirbi nos comunidad cu tanto pasion pa temanan cu pa hopi por ta no tin importancia, pero pa Sr. Refunjol si. ‘Hopi bes nos a papia riba e temanan aki y ora mi sali di su oficina mi tabata pensa cuanto balor e combersacionnan aki tin pa motibo cu porta cu otro personalidadnan e temanan aki no ta yega e profundidad, e diversidad di locual nos tabata alcansa den nos combersacionnan.” Eman a bisa e famia presente “Boso tin un casa, un tata y welo cu un dedicacion sumamente grandi. Un persona special cu un curason grandi cu a sa di uni e pais aki na e momentonan dificil cu nos a pasa aden. Awor e tempo a yega pa Sr. Refunjol bay lama, pisca cu amigonan, hunga biyar, baseball y planta den cura. Interesnan cu nos tur sa di nan y cu awor e tin tempo pa nan, aunke el a priminti di yuda ora mester como consehero.” Den nomber di gobierno di Aruba Prome Minister Eman a regala Sr. Refunjol un buki cu potretman di actividad, evento y otro momentonan special durante su periodo como gobernador di Aruba.

